


密菴語錄

全



京都大学

93 0486

圖書

密菴禪師語錄序

密菴禪師示寂之三年其得法真子住
靈巖了悟以 老師平生語一編屬鑑
作序鑑切謂老師一見應菴便明大法
破沙盆語盛播叢林此無可序者七鎖
名山道滿天下一時龍象盡出鉗槌此
亦無可序者入對

未常住全冊



中宸闡揚般若深契

上意益光宗門此亦無可序者然鑑叨承衣付義不容默謹爲之序曰密菴語錄一帙摠八十八板板二十二行行二十字若於此薦得許親見密菴如或未然聽取一轉語淳熙十五年冬仲月九日叅學張鑑序

密庵和尚住衢州四烏巨山乾明禪院語錄

叅學小師

崇岳

了悟

等編

師於乾道三年八月初一日就本院受請陞座云適來未鳴鼓已前唆作傑上座而今陞座已後唆作烏巨長老驟爾更其名易其號披毛戴角拖犁拽杷向異類中頭出頭沒既然業債難逃只得歡喜忍受恁麼見得徹去新長老出世事畢其或未然傑上座今日失利 叙謝不錄

復舉三聖道我逢人則出出則不爲人興化道我逢人則不出出則便爲人後來白雲端和尚拈云二尊宿各有一處打得著且道那箇在前那箇在後師召

大衆云白雲端和尚錯下名言殊不知一尊宿前不
至村後不迭店直至于今翻成話霸何故字經三寫
烏焉成馬下座

入方丈據座云此室甚深廣大非語默可及淨名居
士向遮裏寐語未惺七佛祖師到來納敗愈甚傑上
座口似乞兒破席袋又如何施設喝一喝云不入洪
波裏爭見弄潮人

八月二十二日就本院開堂拈香祝

聖龍復拈香云此一瓣香收來久矣欲隱彌露今日
人天普集不免從頭說破昔年行脚自江西回擬往
四明方抵婺州智者却被傍觀兄弟錯指路頭撞入

衢州明果山中見箇老和尚列列挈挈太煞不近人
情既已將錯就錯禮了三拜直至于今悔之不及雖
然如是寃有頭債有主藝向爐中供養末後住天童
山第十八代應庵大和尚用酬法乳之恩遂歛衣就
座問蒼龍乃云袒師心印狀似鐵牛之機去則印住
住則印破森羅万象明暗色空情與無情一印印定
更無絲毫透作更無絲毫走作更無絲毫起滅更無
絲毫動搖如金博金似水洗水了絕異緣迥超諸有
以此壽聖人則天長地久以此祝賢守則伊尹周
公以此安樂生民以此康福天下以此播揚大教以
此扶豎正宗然雖如是且道印子即今在什麼處良

父擊拂子云鵬弓高掛狼煙息萬國歌謠樂太平
復舉保壽開堂三聖推出一僧保壽便打三聖云與
麼爲人賠却鎮州一城人眼去在保壽擲下拄杖歸
方丈師云二尊宿美則美矣若要扶臨濟正宗每人
各欠一頓棒在且道那裏是他欠處具擇法眼者試
定當看

上堂佛說一切法爲度一切心我無一切心何用一
切法既無心又無法山河大地甚處得來見聞覺知
復是何物乃喝一喝云臨崖看潯眼特地一場愁
上堂一進一退一動一靜湏信那伽常在定一擒一
縱一殺一活四方八面活鱗鱗嘉州大象喫鹽多陝

府鐵牛添得渴若作佛法商量喫鐵棒有日在

上堂知幻即離不作方便以拂子左邊擊一下云向
遮裏薦取離幻即覺亦無漸次以拂子右邊擊一下
云向遮裏薦取一人發真歸元十方虛空悉皆消殞
以拂子中間畫一畫云向遮裏薦取烏巨葛藤盡被
諸人覷破了也諸人鼻孔眼睛被烏巨拂子穿却因
什麼不覺不知其間或有一箇半箇慕地知非黑漆
拄杖未放過在何故曹溪波浪如相似無限平人被
陸沉

上堂僧問德山托鉢意旨如何師云無意旨進云因
什麼托鉢下僧堂師云要行便行要坐便坐 乃舉

雪峯和尚示衆云盡大地撮來如粟米粒大拋向面前漆桶不會打鼓普請看師云選老子三登授子九到洞山做盡計較末後却向鰲山店裏打箇沒折合放聲道今日始是鰲山成道今日始是鰲山成道便將大地人物作自己受用致令千載之下凌辱宗風烏巨與麼告報不是抑他雪峯且要天下衲僧向後各各自有生涯莫惣作選野狐精見解喝一喝下座聖節上堂摩訶衍法離四句絕百非諸佛說不到拂子善提持乃舉起拂子云還見麼以此祝 君壽壽筭等須彌

上堂舉世尊在靈山會上五百比丘得四禪定具五

神通未得法忍以宿命智通各各自見過去殺害父母及諸重罪於自心內各各懷疑於甚深法不能證入文殊承佛神力遂手握利劍持逼如來世尊謂文殊曰往往不應作逆勿得害吾吾必被害爲善被害文殊師利爾從本來無有我人內心起時我必被害即名爲害於是五百比丘自悟本心如夢如幻於夢幻中無有我人乃至能生所生父母於是五百比丘同讚嘆曰文殊大智士深達法源底自手握利劍持逼如來身如劍佛亦爾一相無有二無相無所生是中云何殺師云爲人須爲徹殺人須見血文殊費盡腕頭氣力要且不知此劍來處帶累釋迦老子通身

是口也分疎不下五百比丘焦麼悟去入地獄如箭
射忽若踏翻大海趯倒須彌雲門扇子踣跳上梵天
聖著帝釋鼻孔東海鯉魚打一棒兩似盆傾又作麼
生商量良久云自從舞得三臺後拍拍元來惣是歌
上堂以楔出楔翻成途轍以心傳心轉見病深達磨
不會當頭句却向嵩山面壁九年後代兒孫承虛接
響揚眉瞬目行棒行喝盡是黃葉止啼烏巨到遮裏
直得上天無路入地無門咬定牙關且與諸人和泥
合水卓拄杖一下云不是一番寒徹骨爭得梅花撲
鼻香下座

因雪上堂滿目紛紛呈瑞雪填溝塞壑誰辨別文殊

無虱頓渾身普賢失却真妙訣烏鷄變作白頭鷄鐵
樹翻成銀線結報諸人瞥不瞥疑際無人立片時便
是太平底時節喝一喝下座

上堂舉昔日有婆子供養一庵主經二十年常令一
女子送飯給侍一日令女子抱定云正與麼時如何
主云枯木倚寒巖三冬無暖氣女子歸舉似婆婆云
我二十年只供養得箇俗漢遂發起燒却庵師云遮
箇公案叢林中少有拈提者傑上座裂破面皮不免
納敗一上也要諸方檢點乃召大眾云遮婆子洞房
深穩水泄不通偏向枯木上糝花寒巖中發焰箇箇
孤身迥迥慣入洪波等閑坐漸發天潮到底身無清

滴水子細檢點將來敲枷打鎖則不無二人若是佛法未盡見在烏巨與麼提持畢竟意歸何處良久云
一把綠絲取不得和煙搭在玉欄干

上堂有物先天地無形本寂寥能為萬象主不逐四時凋且道是什麼物有般無鼻孔漢便道描也描不成畫也畫不就佛眼覷不見不識不知如斯理論正所謂一句合頭語萬劫繫驢橛烏巨有一則語非是扶宗豎教且要與天下衲僧剥盡貼肉汗於諸人切須諦聽良久云匙好挑飯筋好筌菜參

上堂舉僧問梁山家賊難防時如何山云識得不為冤僧云識得後如何山云與向無生國裏僧云莫是

他安身立命處也無山云死水不藏龍僧云如何是活水龍山云興雲不吐霧僧云忽然傾湫倒嶽時如何山下繩床把住云且莫濕著老僧袈裟角師召大眾云梁山老賊慈悲太煞與賊過梯引入屋裏劫盡家財攬吵一上不解勦絕他命根致令偷心不死若是烏巨則不然忽有問家賊難防時如何便與一刀兩斷教他洒洒落落作一枚白拈賊到處偷營劫寨鷲拈拄杖云遮一隊賊漢來遮裏討什麼下座一時趕散

上堂舉龐居士頌十方同聚會師云鐵壁银山箇箇學無為師云日月照臨此是選佛場師云龍蛇混雜

心空及第歸師云凡聖同居慕拈拄杖橫按云罷者
士在遮裏坐地是汝諸人還見麼遂擲下拄杖云三
生六十劫

上堂舉僧問雲門久雨不晴時如何雲門對道剗師
云大衆雲門一剗乾坤剗匝海水騰波須弥髮業慕
拈拄杖卓一卓云雲門大師向遮裏無出氣處且道
烏巨活人眼在什麼處復卓拄杖云久雨忽晴天清
地寧寒山撫掌拾得忻忻恁麼會得旱地遭釘
李侍郎入山上堂幽禽噪破那伽定便見文星入寺
來倒提門迎開笑面林泉陡覺起風雷風雷起處萬
壑生春正眼洞明十虛無間手携仲尼日月腰佩佛

祖靈符在處爲瑞爲祥爲龜爲鑑牆漚法門股肱王
室不是神通妙用亦非法爾如然何謂如此自從踏
斷千差路便向毗盧頂上行

上堂卽心卽佛鐵牛無骨非心非佛空山突兀不是
心不是佛不是物入從陳州來却得許州信報道今
年蚕麥熟風雨時五穀豐萬民樂東村王老聞得嘻
嘻而歌曰從來不唱脫空歌把火燒山拾田螺白牯
搗頭魚扇子急水灘頭鳥作窠好大衆不是文章四
六亦非少室單傳哆哆和和如薦得祖師鼻孔一時
穿以拂子擊禪床下座

上堂僧問大龍老倒放癡憨澗水山花錯指南堅固

法身無覓處千峯盤屈色如藍正與麼時如何師去
剔起眉毛直下薦取進云直得上無攀仰下絕已躬
師云畢竟向甚處安身立命進云平生心膽向人傾
師云猶在半途進云忽有問和尚色身敗壞如何是
堅固法身未審如何對他師云破草鞋進云處處綠
楊堪繫馬家家門裏透長安便禮拜 師乃舉外道
問佛不問有言不問無言世尊良久外道讚嘆云世
尊大慈大悲開我迷雲令我得入師云黃面老子爲
久天師被外道輕輕問著便見七穿八穴外道不識
好惡更言大慈大悲開我迷雲令我得入正是夢中
說夢外道去後阿難問外道有何所證而言得入世

尊云如世良馬見鞭影而行師喝云向什麼處去來
黃面老子當時若下得透一喝兒孫未至掃土衆中
莫有爲黃面老子作主底麼出來與烏巨相見良久
云叫下座

上堂僧問有句無句如藤倚樹樹倒藤枯句歸何處
師豎起拂子云還見麼進云鷄子過新羅師云不如
禮拜好 師乃云有句無句如藤倚樹石裂崖崩毒
蛇當路樹倒藤枯悉哩蘇噓瀉山呵呵大笑和賊捉
敗了也且水不洗水一句作麼生道皇天無親唯德
是輔

國清直庵和尚到上堂雲開千嶂出木落一枝分相

見又無事不來還憶君 敘謝畢 復舉芙蓉和尚上
日訪實性大師大師陞座以右手拈拄杖倚左邊云
此事若不是芙蓉師兄大難委悉師召大眾云實性
大師弄功成拙鈍置他芙蓉師兄今日國清師兄到
來烏巨也不拈拄杖亦不與麼道且道與古人是同
是別良久云相逢自有知音知何必清風動天地
上堂今朝六月十五祝 聖陞堂擊鼓木童火裏吹
笙石女雲中作舞也大奇也大奇天無四壁地絕八
維五湖四海來入貢衲僧聞見眼如眉喝一喝下座
解夏上堂僧問如何是正法眼師云草鞋無夾進云
只如和尚道破砂盆又作麼生師云老僧不曾動著

舌頭進云此語已遍天下師云杓卜聽虛聲 師乃
云烏巨今日解夏乃遵黃面老子二千年前話霸驢
驢人徹底冰清護戒珠了無縫罅唯有露柱燈籠不
肯入遮保社何故從來心似鐵端不受差排
病起上堂一葉飄空萬木秋翻思光境急川流若人
識得其中意坐斷千差向上頭山僧數日來似病不
病似安不安似死不死方丈裏撒屎撒尿大開眼狂
言寐語直是東西不辨南北不分求生不得求死不
得釋迦老子爲四生慈父三界醫王也覓此病起處
不得正當此時若人救得山僧點一盞薄荷湯與伊
濕口若救不得如人上山各自努力閻羅大王不是

你爺他時打你鬼骨簪索飯錢去在莫言不道、
上堂天上月圓人間月半槌鼓陸堂理舊公案且作
麼生是舊公案車不橫推理無曲斷

上堂盡乾坤大地唆作一句子擔枷帶鎖不唆作一
句子業識忙忙兩頭俱透脫淨裸裸赤洒洒沒可把
達磨一宗掃土而盡所以雲門大師道盡乾坤大地
無絲毫過患猶是轉句不見一色始是半提更須知
有全提時節大小雲門劍去久矣方乃刻舟

上堂舉金峯和尚示衆云老僧二十年前有老婆心
二十年後無老婆心時有僧出問如何是和尚二十
年前有老婆心峯云問九峇九問聖峇聖僧云如何

是二十年後無老婆心峯云問九不答九問聖不答
聖師云烏巨當時若見但冷笑兩聲這老漢忽若瞥
地自然不墮聖九窠曰

上堂卅尊拈花勾賊破家迦葉微笑聲前失照雪峯
輓毬雙放雙收玄沙未徹眼中按屑雲門顧鑒迎相
脫賺俱脰豎指全無巴鼻遮一隊漢敵國家財盡被
烏巨藉沒了也直得上無片瓦下絕卓錫却來眉毛
縫罅裏埋冤負屈聲聲叫道無惻隱之心非人也無
羞惡之心非人也無是非之心非人也烏巨痒處被
他抓著不覺手之舞之足之蹈之驀拈拄杖擲下云
遇赦咸放

上堂少室單傳被僧巴鼻確甯生花驢鳴狗吠厠坑
籌子念摩訶驚起法身無處避無處避若爲論驀拈
拄杖卓一卓云我行荒草裏汝又入深林

烏巨乾明禪院語錄終

衢州大中祥符禪寺語錄

參學小師

崇岳

了悟

等編

上堂在眼曰見在耳曰聞在手執捉在足運奔豁開
則東西南北把住則毫髮不存且道豁開好把住好
驀拈拄杖卓一卓云一氣不言含有象萬靈何處謝
無私

上堂舉盤山道向上一路千聖不傳慈明和尚道向
上一路千聖不然二尊宿與麼大似靈龜曳尾祥符
道向上一路掘地覓天

上堂靜悄悄颺跳得出鬧浩浩颺可橫身鬧浩浩颺
挨得行靜悄悄颺堪駐足所以德山據一條白棒佛

來也打祖來也打且不坐在關浩浩靜悄悄又道
我三十年不曾打着箇獨脫底祥符門下若有獨脫
底正好喫來洗脚

上堂月生一無角鐵牛眠少室月生二赤脚波斯入
關市月生三冰生於水青出於藍驀拈拄杖橫按顧
視云文殊堂裏萬菩薩夜來盡向此中參

謝知事頭首上堂一新一舊跳出窠臼一出入胡
餅裏呷汁一擒一縱開眼作夢一照一用鱉魚走入
麻油甕所以道若論此事直須揮劍若不揮劍漁父
棲巢古人與麼大似將錢買李子只從赤邊咬且道
結角在什麼處驀拈拄杖卓一卓下座

冬至上堂日南長至慶無不利石笋暗抽條寒巖增
暖氣東村王老半醉半醒林下道人沒巴沒鼻驀拈
拄杖云若人於此徹根源勝似燃燈親授記擲拄杖
下座

上堂舉盃官示衆云虛空爲鼓須彌爲槌是什麼人
打得衆無語南泉云我當時若見向他道王老師不
打遮破鼓後來法眼道南泉何須道遮破鼓但道不
打自然是箇破鼓師云盃官提水放火南泉撥亂灰
飛法眼埋兵掉闔諸尊宿雖然各出一隻手並無一
人性燥下得一槌只是隨例扛鼓祥符直截與諸人
道却虛空爲鼓須彌爲槌添桶衆堂去

歲旦上堂元正一且萬事成辦大乘小乘并索錢貫
更問佛法如何也是秦時轆轤鑽

寶鑑大師請入金剛五臟師指金剛云賢劫千佛數
末後最慙慙倒握降魔杵高標利物拳心肝無屈曲
腸胃有區分神通願力雖無盡且為山僧護法門

上堂譬如擲劍揮空莫論及之不及斯乃空輪絕跡
劍刃無虧正與麼時如何遂顧視左右云填溝塞壑
無人會兩過夜塘秋水深

上堂舉藥山久不上堂寺主白云大眾久思和尚示
誨山云打鐘著寺主打鐘大眾雲集山便歸方丈主
隨後白云和尚許為衆說話何故一言不措山云經

有經師論有論師又爭怪得老僧後來翠巖芝和尚
云寺主怪藥山不為衆說話可謂悞他三軍師云翠
巖只具一隻眼殊不知藥山歸方丈便是勞他三軍
掛寺額上堂當頭一著坐斷諸訛佛手不能遮古今
為勝樣入天交慶祖室生輝南來北來盡由此門而
入真書大篆無非法令鉗鎚拈拄杖卓一卓乃召大
衆云乾坤未立世界未形且道遮一著落在什麼處
遂提起云看海神知貴不知價畱與人間光照夜
擲拄杖下座

上堂不求諸聖不重己靈摺折德山棒啞除臨濟喝
終日泥猪疥狗哆哆和和不記月之大小歲之餘閨

知他是凡耶是聖耶祥符若放過三十年後遭人檢點若不放過如何道得轉身句喝一喝云上士由山水中人坐竹林

上堂舉文殊問無著南方佛法如何住持無著云末法比丘少奉戒律又問多少衆無著云或三百或五百無著問文殊此間佛法如何住持文殊云龍蛇混雜凡聖同居又問多少衆文殊云前三三後三三乃召大衆云或三百或五百置之勿論只如文殊道前三三後三三如何話會良久云竹影掃地塵不動月穿潭底水無痕

上堂舉圓覺經中道居一切時不起妄念於諸妄心

亦不自息滅住妄想境不加了知於無了知不辨真實雪堂和尚拈云枯樹雲充葉凋梅雪作花擊筒方木響蘸雪喫冬瓜長天秋水孤鷺落霞師云釋迦老子搭得一擔瞞瞞出來撞著雪堂和尚添得一擔顛顛祥符不是壓良爲賤也要緇素分明生鐵鑄牛頭牽犁還拽把智者笑忻忻愚人驚怪差古往今來幾百年更向鬼門重貼卦驀拈拄杖云看看釋迦老子來也向諸人道據虎頭收虎尾第一句下明宗旨卓一卓下座

祥符禪寺語錄終

建康府蔣山太平興國禪寺語錄

參學小師

崇岳

了悟

等編

入寺拍三門云無礙解脫門重重寶樓閣不勞歛念
八字打開信脚便行自然聲和響順若也躊躇便見
撞牆撞壁

入佛殿燒香云因我得禮你窮源親到底禮拜了燒
香自倒還自起

上堂正令全提十方坐斷千差萬別一句該通佛與
衆生皆爲剎法恁麼會得全賓是主全主是賓且超
越一句作麼生道良久云蠱毒之家永莫嘗

聖節上堂諸佛不說說祖師不聞聞留下一轉語千

古鎮乾坤且道是那轉語驀起恭身叉手云
皇帝萬歲萬萬歲

施主請上堂師據座顧視左右驀拈拄杖云今佛放
光明助發實相義乃卓一下云希有諸比丘是中難
比况復提起云還見蔣山拄杖子麼朝到西天暮歸
唐土向諸人道有世界以音聲爲佛事有世界以香
飯爲佛事有世界以出入息爲佛事復卓一下云且
道遮箇世界將什麼爲佛事擲下拄杖云阿喇喇四
方八面活鱖鱖

上堂月生一萬像不能逃影質月生二東行不見西
行利月生三無言童子口喃喃背手拈起無星秤子

秤須彌山重一斤十二兩即不問諸人且道觀世音
菩薩爲什麼頂戴彌陀參

上堂一葉落天下秋南來北往竟悠悠一句通萬機
息上下四維無等四西天人不會唐言獨坐少林癡
面壁帶累兒孫不丈夫被人喚作白拈賊乃召大衆
云雲門念七好參詳寶公不是閑和尚

上堂高高處無物堪比倫低低處猶難擬議一毫端
上立寶王剎寬廓非外百草頭上突出妙喜世界寂
寥非內權實照用並行敲碎觸體裏眼睛捏出虚空
裏骨髓且聽諸人東卜西卜忽若把斷要津如何通
信八月秋何處熱

上堂僧問崔趙公問國一祖師云弟子欲出家得否
國一云出家乃大丈夫事非將相所能爲意旨如何
師云來機深辨進云若無舉鼎拔山力千里烏雖不
易騎師云好箇衲僧進云石門聰和尚舉似李都尉
都尉於此悟去時如何師云你且道他悟得箇什麼
進云學道須是鐵漢斫手心頭便判直趣無上菩提
得失是非莫管師云不因上座舉幾乎忘却 師乃
云諸佛說不到處祖師提不起時一段光彩盡在蔣
山指甲縫裏放行則三頭六臂把住則水泄不通且
道不放行不把住時如何日月光天德山河壯帝居
上堂月圓月缺循途守轍打破牢關天寬地寬 聖

人以百姓心爲心自然海晏河清萬民樂業耕而食
鑿而飲終日熙熙然如享太牢不知 帝力於我何
有哉正與麼時且道還有佛法道理也無喝一喝云
三點前三點後

冬至日入新衆寮上堂天不言四時行地不言萬物
生 聖人不言垂衣拱手萬國來王衲僧不言移凶
星爲吉曜捏大地作伽藍裁長補短革故鼎新便見
玲瓏八面峭峻一方坐斷溪山包羅風月且入門一
句作麼生道一陽來復後瑞氣自騰騰

施主追修請上堂諸佛未出世達磨不西來人人抱
荆山之璞箇箇懷赤水之珠及乎五葉開敷千燈續

密庵語
十一
焰便見生死交謝寒暑迭遷北里豪家昨日歌方今
日哭蔣山與麼告報大似移花兼蝶至買石得雲饒
諸人若善參詳管取終日於聲色頭上坐卧聲色不
能染汚終日於生死界中出沒生死不能籠罩且據
箇什麼道理便能如是驀拈拄杖云千聖不知何處
去倚天長劍逼人寒

木庵和尚遺書至拈香云大衆還識選尊慈麼雖與
我同條生不與我同條死稔聞在七閩揚塵兼斂土
凌蔑宗風不奈何今朝喜見清平路清平路既見畢
竟如何茶傾三奠香焚一爐伏惟尚享

上堂舉洞山與密師伯同到栢巖巖問二上座甚處

來山云湖南來巖云觀察使姓什麼山云不委姓巖
云名什麼山云不委名巖云還理事也無山云自有
廊幕在巖云還出入也無山云不出入巖云豈不出
入山拂袖便行巖次日侵早入堂召二上座近前云
昨日問上座不恹老僧意一夜不安今請上座別下
一轉語若恹老僧意便開粥相伴過夏山云却請和
尚問巖云豈不出入山云太尊貴生巖乃開粥同過
夏師云明投暗合八面玲瓏不犯當頭轉身有路曹
洞門下足可觀光若是臨濟兒孫棒折也未放在當
時見他道不委姓巖曾便與一拳這裏挨得身轉非
但開粥相待亦可明窓下安排有麼有麼喝一喝云

漆桶參堂去

上元上堂今朝上元節是處掛燈毬一燈燃百千燈
燈燈相續重重無盡如寶絲網三世諸佛向光影裏
出現六代祖師向光影裏說法度人四聖六凡向光
影裏頭出頭沒山河大地向光影裏成立諸人若信
得及去覓其光影來處了不可得便乃坐斷報化佛
頭若信不及十二時中被光影使得七顛八倒

上堂舉修山主云是柱不見柱非柱不見柱是非已
去了是非裏薦取師喝云孟春猶寒在日月幾時遷
上堂一切數句非數句與吾靈覺何交涉毒蛇鑽入
你鼻孔蝦蟆咬破你眼睛且喫什麼作靈覺有般漢

東西不辨南北不分便道經行及坐卧咏與粥喫飯
咏正是喫奴作郎認賊爲子蔣山直截與諸人道却
毗婆尸佛早留心直至而今不得妙

蔣山語錄終

常州褒忠顯報華藏禪寺語錄

參學小師

崇岳

了悟

等編

師在和州褒禪受請拈帖云三回兩度推不去今日
依前把不住不是時節因緣亦非人情之故既然如
是因什麼撞頭磕腦不見道順是菩提

上堂方脫鐘山塔級難却來遮裏養殘軀那知蹤跡
難遮掩又見驅馳走使符使符既至回避無門按下
雲頭和泥合水便見全賓是主全主是賓賓主交參
通同和氣且應時納祐一句作麼生道喝一喝云劍
為不平離寶匣藥因救病出金瓶

入方丈據座云獅子教兒迷子訣擬前跳擲早翻身

羅紋結角交鋒鴈眼臨時失却蹤古人與麼道也是徐六擔片板

上堂僧問鐘山頂上雷聲震華藏海中浪拍天洗脚上船乘快便遶回贏得日高眠如何是到家一句師云坐立儼然進云流水下山非有意白雲歸洞本無心師云你也乱走作麼進云被和尚捉敗師云箇

師乃云昔日文殊大士三處度夏一月長者家一月魔宮一月娑坊末後却歸世尊會中解制迦葉欲白槌擯出纔舉念身無量世尊無量迦葉無量文殊世尊云汝欲擯那箇文殊迦葉盡其神力槌不能擯後來尊宿拈云好一槌又却放過甘作小乘人師云尊

宿與麼也是盲人摸象傑上座今夏蔣山結夏褒禪破夏華藏終夏且道與文殊是同是別若道是同許他具一隻眼若道是別也許他具一隻眼忽有箇不受人瞞底出來道長老也好涩漚只向他道涩漚中有箇分曉處急須聽取三處移場定是非頑心全不改毫釐胡言漢語憑誰會鐵額銅頭也敲眉

次日爲太師循忠烈王陞座僧問大賢化德今猶在攀感之心動四維林下道人何以報聊將無孔笛橫吹師云知音知後更誰知進云知音一句則不問無孔笛作麼生吹師豎起拂子云還聞麼進云五天吹不起漠地和難齊師云又被風吹別調中進云只

如太師循王今日深領和尚法音未審超何地位
師云泥多佛大進云還許學人借水獻花也無師云
又且何妨進云亡過無疑登九品見存此去列三台
師云只消遮一句僧禮拜師乃云心生種種法生心
滅種種法滅心法兩忘如搗塗毒鼓聞者皆喪又如
大火聚近之則燎却面門悟之者立地成佛迷之者
永劫輪迴所以諸佛所說唯說此心祖師所傳唯傳
此法靈山會上五百比丘得之自悟本心如夢如幻
於夢幻中不見有我人衆生廣額屠見得之捫下屠
刀叉手云我是千佛一數大集會中大力魔王得之
便道我待一切衆生成佛淨盡衆生界空無有衆生

名字我乃發菩提心豈不是大丈夫能爲大丈夫事
於過量塵沙劫作過量殊勝佛事山僧今日以如是
心說如是法普請大地衆生有情無情同入清淨大
解脫門與太師循忠烈王爲不請友同一眼見同
一耳聞同一受用作廣大殊勝利益不可思議且憑
箇什麼道理便能如是利劍拂開天地靜霜刀纔舉
斗牛寒復舉世尊因地布髮掩泥獻花於燃燈如
來燃燈見布髮處遂約退衆乃指其地云此一方地
宜建梵剎衆中有一賢于長者持標捫於拍處云建
梵剎已竟時諸天散花讚言慶子有大智矣師云大
衆燃燈拍處滴水氷生賢于捫時天回地轉於斯見

得古釋迦不先今 太師不後其或未然更聽重下
注脚莫除荆棘建伽藍七佛常來此處參地父天長
功不墜天花時復雨繆繆

應庵和尚忌日上堂利劍斬虛空萬象鳴爆爆年年
向斯辰令人倍發惡古者道子不談父德雖然家醜
也要外揚遮老和尚平生事過頭底九百自云著草
鞋住院何苦如蜿蜒蛇戀窟美則美矣帶累不肖兒孫
依模脫出贊嘆者從他贊上非非想天毀謗者謗到
空輪水際衆中莫有毀譽不動底麼出來與華藏相
見有麼有麼良久擲下拄杖高聲云侍者收取拄杖
上堂一葉落天下秋風高雲淡水碧空浮達磨不會

接手向少林空坐冷啾啾耐雲門塚根漢復於頭
上更安頭記得僧問雲門達磨九年面壁意旨如何
門云念七師喝云果然只在遮裏良久復云勘破了
也

解夏上堂十五日已前無繩自縛十五日已後脚瘦
草鞋寬正當十五日天無私蓋地無私載風不鳴條
雨不破塊大家撫掌樂升平一任東倒及西擺喝一
喝下座

上堂舉雲門在嶺中時僧問如何是法身向上事門
云向上與你道也不難且道如何是法身僧云請和
尚鑒門云鑒即且置作麼生說法身僧云恁麼恁麼

門云此是長連床上學得底我且問你法身還解喫飯也無僧無語後有僧舉似梁家庵主主云雲門直得入泥入水資福云欠一粒不得剩一粒不得師云雲門渾剛打就生鐵鑄成不動鉗鎚火星迸散梁家庵主冷處著把火義出豐年資福開處愛入頭傍觀者哂華嚴據款結案也要諸方檢點若也檢點得出生陷無間地獄

上堂舉僧問趙州如何是毗盧頂相州云老僧自小出家不曾眼花應庵和尚拈云大小趙州語上偏拈若有問天童如何是毗盧頂相只對他道大底大小底小師云若向趙州語下見得坐殺天下衲僧若向

天童語下見得走殺天下衲僧忽有問華嚴如何是毗盧頂相只對他道碌磚

上堂秋江清淺時白鷺和煙島良哉觀世音全身入荒草且出草一句作麼生道寰中天子勅草舍家風別上堂舉僧問巖頭路逢猛虎時如何頭云拶師云巖頭具殺人不眨眼底手段被遮僧一問却向射垛後驢避若也檢點得出雖是善因而招惡果

上堂牛頭橫說豎說不知有向上關捩子有般漆桶葦東西不辨南北不分便問如何是向上關捩子何異開眼尿床華嚴有一轉語不在向上向下千手大悲摸索不著多時雨寒無處晒眼今日普請布施大

衆良久云達磨大師無當門處

上堂默時說說時默寒山逢拾得拈箇瓦掃帚東掃西掃忽然撞著豐干禪師騎虎出來放下笠筇把手呵呵大笑恰似販私鹽底草賊有什麼共語處復召大衆云且道他笑箇什麼良久云東君行正今花發樹南枝喝一喝

上堂撥轉天關掀翻地軸冰凌上走馬劒刃上翻身未是衲僧行履處萬年一念一念萬年羅籠不肯住呼喚不回頭亦未是衲僧行履處透脫兩重窠臼別有生機一路向百草頭上罷却干戈山僧甘心生陷無間地獄是汝諸人還自檢責麼喝一喝云漆桶參堂去

上堂今朝正月半普請大家看過去燈明如來在汝諸人脚跟下放光動地還見麼若也見得神頭鬼面裏元來有人在若見不得切忌撞牆撞壁復舉明招到招慶有度上座問羅山尋常道諸方盡是麩飯惟有羅山是白飯上座從羅山來却展手云白飯請此子招打兩掌度云將謂是白飯元來只是麩飯招云癡人棒打不死度至夜間舉似諸禪客次招近前云不審度云今日便是這箇上座下兩掌有瑠上座云不用下堂就裏許作麼生道招云就裏許也道道瑠無對招云是你諸人一時縛作一束倒卓向尿闌下來日相見珍重師云尋常向諸人道終日在洪波

浩渺中香水相潑渾身無一點濕是他明招踏著遮些子自然用出閑閑地惜乎鋒頭少銳引得許多葛藤若是華嚴見他道將謂是白飯元來只是麩飯連腮更與兩掌且教遮漢疑三十年

上堂二由一有一亦莫守一念不生楊生左肘達磨大師九年面壁覩不破黃面老子三百餘會道不著德山臨濟咬定牙關一場懣懣華嚴到箇裏如何道之接手句風暖鳥聲碎日高花影重

上堂舉同安察和尚問僧甚麼處來僧云五臺來察云還見文殊麼僧展兩手察云展手頗多文殊誰覩僧云氣急殺人察云不覩雲中鴈焉知沙塞寒僧云

遠超文室乞師一言察云孫賓門下徒話鑽龜僧云名不浪施察云喫茶去僧便珍重察云雖得一場榮別却一雙足師云拳來拳應踢來踢應拳踢交參孰負孰勝搖頭擺尾過牢關則足之言誰肯信雖然有一處請託在諸人試檢點看

上堂僧問楊歧問慈明幽鳥語喃喃辭雲入亂峯時如何明云我行荒草裏汝又入深村意旨如何師云天共白雲曉水和明月流進云應庵道兩箇添桶失却鼻孔又作麼生師云要且扶臨濟不起進云適來和尚恁麼道還扶得也無師云老僧更是不奈何進云應庵只知他人失却鼻孔不知自家落盡眉毛師

云那裏是他落盡眉毛處進云特地一場愁師便喝
進云若非父子至親爭得赤心片片師云上座又錯
會了進云楊歧道官不容針更借一問慈明便喝又
作麼生師云慙是添桶見解進云楊歧云好喝慈明
又喝楊歧亦喝慈明連喝兩喝楊歧便禮拜又作麼
生師云三生六十劫僧禮拜師乃云一槌便成方
木逗圓孔不假一槌填溝壑壑少人知若也脚踏實
地南州打到北州頭愈見金聲玉振若也半前半後
東土移來西土看對面隔千山華藏口似乞兒破席
袋和底一時翻了也若也會得乾三連坤六段若也
不會切忌地盈虛

靈隱佛海禪師遺書至上堂僧問昨夜春風偶發惡
掀倒飛來峯倒卓嘉州大象喫一拳陝府鐵牛掀折
角正與麼時佛海禪師遷化向什麼處去師云大衆
證明進云恁麼則煩惱海中爲雨露無明山下起雲
雷師云川僧得與麼磊直師乃云呼猿洞口虛空
迸裂鷗飛不度如行如說三十三天撲帝鐘打刀須
是賓州鐵喝一喝下座

上堂驀拈拄杖卓一下云上來講讚無限勝因拄杖
子平地踣跳撞倒燈籠露柱驚起太湖龍王惡發把
須彌山一搥直得海晏河清風恬浪靜狸奴白牯迤
相替言善哉善哉風以時雨以時今年蚕麥熟五穀

登東村王大嫂家夜來失却一頭水牯牛渾家大小
尋討不見肚裏熟悶小女呵八從後門出長聲歌曰
尋牛須訪跡學道訪無心跡在牛還在無心道易尋
山僧聞得呵呵大笑且道笑箇什麼喝一喝云三十
年後

聖節上堂靈機廓微妙叶無私智鑑洞明通途絕迹
一切處現吉祥事不昧見聞覺知亘塵沙劫堅密身
突出行住坐卧天上天下歌有道五湖四海樂無爲
林下道人將何報德多子塔前消息在一回拈出一
回新

上堂釋迦不說說拘曲作直迦葉不聞聞望空啓告

馬祖即心即佛掛羊頭賣狗肉趙州勘庵主貴買賤
賣分文不直且如文殊是七佛之師因什麼出女子
定不得河天月暈魚分子欄葉風微鹿養茸

上堂經行及坐卧常在於其中做牛便要拖犁拽杷
做馬便乃嚼鐵負鞍爲人原始要終不求諸聖不重
已靈或則三條椽下或則開市門頭成佛作祖披毛
戴角上天堂入地獄擔鐵枷喫鐵棒惣不爲分外百
千年後築著瞽頭拳踢相應鼻孔遼天也怪山僧不
得何故賊無種相鼓籠

上堂舉僧問雲門死向什麼處去雲門對他道在什
麼處師云雲門秉殺人刀活人劍點檢將來要且不

知去處忽有問華藏死向什麼處去只向他道董胤
自南來殿閣坐微涼

請典座上堂舉夾山在潯山充典座潯山一日問今
日堂中喫甚菜座云兩年同一春山云如法修事著
座云龍宿鳳巢師云柄霸在手縱奪臨時敲磕將來
百味具足其中只欠一味且道是油是醬若點檢得
出華藏功不浪施其或未然更聽重下注脚輔弼宗
門有老成一番提掇一番新咬薑呷醋知鹹淡便是
叢林過量人

上堂拈拄杖卓一下云迷時只迷遮箇復卓一下云
悟時只悟遮箇迷悟兩忘豈掃堆頭重添搯擿莫有
向東湧西沒全機獨脫處道得一句麼若道不得華
藏自道去也擲拄杖下座

上堂舉同安察和尚云喜鵲鳴寒檜心印是伊傳僧
云何必察云衆中有人在僧云同安門下道絕人荒
察云胡人飲乳返怪良醫僧云休休察云老鶴入枯
池不見魚蹤跡師云動絃別曲有唱有酬其唱愈高
其和愈峻其間鄭衛之聲雖則雜然五音六律拍拍
是令

臨安府徑山興聖萬壽禪寺語錄

參學小師

崇岳

了悟

等編

淳熙四年正月初七日師在常州華嚴受請望

闕謝一恩畢捧

勅黃示衆云 鳳闕頒宣群生聳耳當陽拈出匝地

普天喫回枯木龍吟別是一壺春色若也見得

皇恩佛恩一時報畢其或未然却請維那分明宣過

拈疏云諸佛說不到處祖師提不起時結角羅紋語

言三昧盡從箇裏流出輝騰今古不墮斷常欲令四

衆共知何妨重爲說破

陞座拈香祝

聖罷歛衣就座僧問

九重丹詔下

雲端瑞氣融融宇宙寬拈出少林無孔笛憑師吹起
萬年歡師云爐煙裊裊瑞氣盤空進云拶出虛空爲
福海撥轉須彌作壽山師云不爲分外進云三聖道
我逢人即出出則不爲人時如何師云點進云拶師
云莫杜撰進云八字打開師云你從那門而入僧喝
一喝師云幾不問過進云興化道我逢人即不出出
則便爲人時如何師云重言不當吃進云瞞和尚一
點不得師云一任跣跳僧禮拜師乃云至化無私大
千普應皇恩廣被巖谷生春雷動風行龍驤虎驟
無量殊勝併集恒沙妙義全彰不歷化城直登寶所
寶所既至遇緣即宗法隨法行法幢隨處建立移身

拶步物我一如各各不相知法法不相到且全身奉
重一句作麼生道良久云天上有星皆拱北人間無
水不朝東

入寺上堂僧問華藏海中張巨網慣打鯢鯨凌霄峯
頂握鉗鎚陶鑄佛祖而今爐鞴既開一鎚便就時如
何師云漆桶生光進云恁麼則和尚不妨好手師云
莫相鈍置進云僧問應庵和尚遠離光孝來赴妙嚴
如何是不動尊庵云一別蓮城五日程意旨如何師
云步步踏實進云既是不動尊因甚却有五日程師
云穿天下人鼻孔進云和尚遠離華藏來赴徑山如
何是不動尊師云步行進云昔日應庵今朝和尚師

云老僧不識應庵進云今日又爭諱得師云遭上座
檢點僧禮拜師乃云未到此間不妨令人疑著及
乎到來依前門開八字樓閣參空走使文殊普賢驅
馳釋迦彌勒拈一放一草偃風行舉一明三目機鋒
兩如鏡照鏡似空藏空有佛處敲拈打鎖無佛處見
兔放鷹忽若惣不與麼如何通信良久云雲靜日月
正雪晴天地春

淳熙四年五月初十日恭奉 聖旨就景德靈隱禪

寺開堂 皇帝遣中使降賜 御香師謝 恩捧香

示眾云 御寶親封 君王頒賜不是人間薰陸亦

非海外旃檀持來價重娑婆藝處為祥為瑞光揚佛

日仰贊 皇圖山河大地發歡喜心蠢動含靈普熏
正見

判府安撫徽猷度疏師接乃云窮諸玄辯若一毫置
於太虛竭世樞機到底不離於正念復呈起疏召大
眾云正念生也且道其中事作麼生却煩表白宣讀
陞座拈香云此一瓣香恭為祝延 今上皇帝聖躬
萬歲萬歲萬萬歲 皇帝陛下恭願 聖明御極膺
萬國之不圖賢哲佐時協千齡之慶會此一瓣香恭
為祝延 光堯壽聖憲天體道性仁誠德經武緯文
太上皇帝聖躬萬歲萬歲萬歲恭願 堯仁廣被
舜德彌新億萬斯年永隆 眷筭此一瓣香恭為

壽聖齊明廣慈太上皇后 中宮皇后 皇太子
皇孫兩宮天眷莊嚴福筭恭願 壽山增峻福海彌
深同明般若正因共植金剛種智此一瓣香奉爲
參政相公 參政相公 樞密相公 樞密相公
判部尚書 判部侍郎 侍郎 中書舍人 舍人
捧香天使 都知太尉 御帶太尉 諸位勲貴
判府安撫徽猷 都運敷文 文武百僚同資祿筭
此一瓣香焚向爐中奉爲前往明州天童山景德禪
寺第十八代應庵大和尚用酬法乳之恩乃就座靈
隱佛照禪師白槌云法筵龍象衆當觀第一義師云
正令已行千差削迹佛佛從茲授手祖祖於是相傳

恁麼會得便乃高揖釋迦不拜彌勒其或尚留觀聽
何妨致問僧問正法眼藏破顏微笑密付欽光涅槃
妙心三拜歸位獨傳二祖一花五葉遍界芬芳當恁
麼時的的相承一句作麼生道師云須彌頂上浪滔
天進云大千俱捏聚祖令正當行師云雲從龍風從
虎進云中興此道正在今時未審和尚將何祝
聖師云常將日月爲天眼指出須彌作壽山進云恁
麼則舜曰堯風無盡時師云滿口道著進云世尊拈
花迦葉微笑意旨如何師云車不橫推理無曲斷進
云世尊道吾有正法眼藏分付摩訶大迦葉又作麼
生師云蠱毒之家永莫嘗進云只如和箇見應庵分

付个什麼師云一物也無進云爭奈破砂盆何師云
一人傳虛萬人傳實僧禮拜師云切忌妄通消息
僧問演第一義提最上乘會九聖於飛來峯前集人
天於冷泉亭畔把住則天回地轉放行則海晏河清
當恁麼時且道是誰家風月師云人人有分進云一
片月生海幾家人上樓師云一句合頭語萬劫繫驢
橛進云肅宗帝問忠國師如何是十身調御國師云
檀越踏毗盧頂上行意旨如何師云今古歷然進云
普光明殿上撥轉鐵牛機師云此心能有幾人知進
云只如國師道檀越踏毗盧頂上行還明得十身調
御也無師云料掉沒交涉進云今日忽有問徑山如

何是十身調御作麼生祇對師云垂手過膝進云大
唐扶得真天子曾踏毗盧頂上行師云別是一箇春
僧禮拜師云只道得一半師乃云祖師心印狀似
鐵牛之機去則印住住則印破不去不住當頭坐斷
千眼頓開明如果日寬若太虛不可以智知不可以
識識人人具足物物圓成拈一機則千機萬機頓赴
說一句則千句萬句流通譬如善舞太阿一不觸手
二不墮地三不住空又如獅子筋琴撫之則群音頓
絕所以道大人具大見大智得大用攬長河爲酥酪
變大地作黃金普令一切有情無情不墮有爲不住
無爲富貴不能驕貧賤不能困各各安其分守其當

直得堯風蕩蕩帝道平平野老謳歌漁樵鼓舞且憑
箇什麼道理便乃如是天高群象正海闊百川朝謝
詞不錄復舉波斯匿王問佛勝義諦中還有世俗諦
否若言其有智不應一若言其無智不應二一二之
義其義云何佛言大王於過去龍光佛所曾問此義
我今無說王亦無聞無說無聞是名一義二義師云
拓開天關踏翻地軸三言見諦句句朝宗還他過量
人能提過量事於過量境界中作過量殊勝佛事雖
然未免一處請訛在今日忽有問徑山勝義諦中還
有世俗諦否若言其有智不應一若言其無智不應
二一二之義其義云何只對道日月光天德山河壯

帝居太平何以報萬國盡歡呼以立眾慈伏惟珍重
靈隱佛照禪師白槌云諦觀法王法法王法如是
府中歸上堂一出入一動一靜酒肆茶坊紅塵鬧
市猪肉案頭驀然築著磕著如虎戴角凜凜風生及
乎歸來相見依舊眉毛烏翠律地且道是佛法耶世
法耶記得修山主云具足凡夫法凡夫不知具足聖
人法聖人不會卓拄杖云一不知二不會東西南北
轉霧霈

建會上堂千巖釀秀萬木回春羅漢會興貫通今古
一願龍王福護瑞雪快晴二願施主歸崇駢臻輻輳
三願大眾同心同德扶掖叢林滴水冰生始終一致

山僧曾有語云一手不獨拍衆手鳴擗擗豁開三要
三玄門堪與人天爲軌則昔日與麼道今日與麼舉
也是熟處難忘復舉死心和尚示衆云一人所在
也須到半人所在也須到無人所在也須親到師云
死心和尚有年有德語不妄發如大冶精金千煅萬
煉成繞指之金然後裁截並無虛弃雖然畢竟意歸
何處三邊一箭收功後四海何愁不太平

結制上堂今朝十五日叢林皆結制徑山有條繫條
無條攀例逼拶露柱燈籠盡要心空及第現前普請
證明不妨神通游戲下座各叙時暄便是靈山受記
遂拈拄杖云唯有拄杖子列列擎擎磽磽諸諸搖頭

擺尾道是不是復召大衆云且道拄杖子有什麼
長處遂擲下云不是不是不是下座

請前堂首座鶴林印和尚立僧上堂佛法無人說雖
慧不能了去却上頭関面南看北斗虚空掛劍殺活
臨時鞭起臨濟暗驢放出五祖鐵酸醃盡大地人亡
鋒結舌扶豎佛祖正宗還他過量人能持過量事過
量人已見過量事已聞且不涉言詮一句如何通信
下座煩知事頭首大衆詣首座寮扣問

降御香到上堂天地合其德日月合其明四時合
其序風以時雨以時國泰時平民康物阜萬姓四民
合其一心熙熙焉陶陶焉一人有慶兆民賴之是故

林下禪人居於四民之外二六時中據德山棒擔睦
州板驅耕夫牛奪飢人食拈一莖草作文六金身將
六金身作一莖草卷舒自在縱奪臨時堪報不報
之恩共助無爲之化復舉肅宗帝問忠國師如何
是十身調御國師道檀越踏毗盧頂上行前日開堂
次僧問如何是十身調御山僧對他道垂手過膝諸
人且道山僧與麼答他與國師是一是二若道是一
語言參差若道是二佛法豈有兩般畢竟如何大海
若知足百川應倒流

舉後堂演首座立僧上堂舉一不得舉二放過一著
落在第二徑山即不然舉一了舉二截斷露布葛藤

突出衲僧巴鼻如獅子王哮吼一聲壁立萬仞誰敢
正眼覷著一向恁麼去三十年後何止法堂前草深
一丈所以釋迦老子道譬如琴瑟笙簧雖有妙音若
無妙指終不能發諸人要知妙音妙指齊發麼下座
誦首座寮告香

天由聖節上堂心同虛空界示等虛空法證得虛空
時無是無非法既無是又無非便乃以虛空爲正體
以恒沙國土爲妙用以須彌不動之山爲壽山以功
德甚深之海爲福海包羅萬有津濟四生實天中之
天聖中之聖適當誕彌之月仰傾葵藿之誠一句全
提千祥併集祝聖君壽地久天長

上堂平白地上拈起一絲毫頭盡大地人亡鋒結舌
遠過恒沙國近在口皮邊會則確甯生花不會則鐵
牛銜草去却兩頭機如何通信良久云以雨不晴脚
下泥深三尺

謝知事上堂拈拄杖攢按云你有拄杖子我與你拄
杖子你無拄杖子我奪你拄杖子芭蕉老漢只能瞻
前不能顧後將常住物私置草簿花破過頭致令後
代兒孫向拄杖子節目上更生節目凌辱宗風徑山
乾索索地有也不與無也不奪爲甚如此卓拄杖云
一朝權在手看取令行時

出鄉上堂六月炎炎如火熱誰知冷飈勝冰雪紅塵

開市等箇人七佛軌儀都漏泄報龍王須福護大千
捏聚爲檀度一言劄住萬機通自然光壯少林風
復舉世尊一日食時將至勅阿難持鉢云當依七佛
儀式阿難遂問如何是七佛儀式世尊召阿難阿難
應諾世尊云持鉢去師云大小世尊被阿難輕輕靠
著未免喚鐘作甕

上堂舉僧問投子月未圓時如何子云却却三箇四
箇僧云圓後如何子云吐却七箇八箇師云吞却與
吐却筭來無處著要見滑稽人便是王番綽

上堂無門無傍四達皇皇吾不知其名字故強名之
曰道厠坑等子踣跳入諸人八萬四千毛竅裏觸著

五臟神惡發連塊兩掌直得血凝梵天山僧聞得袖
手熙熙如登春臺如享太牢是汝諸人還覺腦門重
麼喝一喝下座
施司諫訃音至上堂風行草偃水到渠成信脚與麼
來雲收霧捲是處皆春信脚與麼去空澄海湛物我
一如所以道去來不以象動靜不以心如是則塵塵
刹刹普現威權蓋色騎聲纖塵不立羅籠不肯住呼
喚不回頭古聖不安排至今無轍跡且道司諫施公
即今在什麼處良久云黃梁纔夢斷竺國一花敷
復說偈云昔年相見談真諦今日陞堂話去來一念
廓然無向背春光鐵樹自花開

上堂僧問世尊道見見之時見非是見見猶離見見
不能及時如何師云一槌擊碎進云只如山河大地
日月星辰縱然前陳離見見底是箇什麼師云分身
兩處看進云直得描不成畫不就師云也是齋後鐘
師乃舉鏡清問玄沙學人乍入叢林乞師指箇入路
沙云還聞偃溪水聲麼清云聞沙云從渡裏入鏡清
於此得箇入處五祖和尚云果是得入才任四方入
面若也未然輒不得離却渡裏師云三大老惣是歧路相添
箇得入直須離却渡裏師云三大老惣是歧路相添
桶相揩有甚快活處徑山則不然入之一字亦不喜
聞

謝知事頭首上堂云敘謝之餘復有何事其進也風行草偃水到渠成其退也玉蘊荆山其價愈重且道不落進退一句作麼生道油煎石礮盛風吹毛毬走虛空背上白毛生拈得鼻孔失却口喝一喝下座上堂諸佛說不到處人人開口道著諸佛行不到處人人舉足踏著既道著又踏著因什麼從朝至暮不自覺知良久云只為分明極翻令所得遲

上元上堂十五日已前明頭來明頭打十五日已後暗頭來暗頭打正當十五日一燈然百千燈燈燈相續廓徹聖九觀世音菩薩將錢買胡餅放下因什麼却是箇鐵酸賺若作佛法商量故是匙挑不上不作

佛法商量平地陷人無數忽不與麼也是食飽傷心下座

街坊納疏上堂僧問寶山既到莫空歸如何是徑山寶師云有眼者見進云圓陀陀光燦燦遮邊那邊無不著師云海神知貴不知價留與人間光照夜進云和尚還知麼師云老僧若知即說似上座師云去年第一會水陸街坊今年羅漢第一會裏納疏識得去年人便是今年事今年與去年非新亦非故搨鼓共證明眉毛俱卓豎北鬱打三更西瞿日未暮其施汝者不名福田供養汝者墮三惡道還會麼行到水窮處坐看雲起時復舉僧問趙州如何是不錯

底路州云明心見性是不錯底路師云趙州眼觀東
南意在西北大似狐狸戀窟窟有甚快活處忽有問徑
山如何是不錯底路只向他道家家門裏透長安
上堂舉僧問風穴語默涉離微如何通不犯泥云長
憶江南三月裏鷓鴣啼處百花香風穴老和尚將白
麤和麤殼粟了引得後來人徒向百花香處作道理
成群作隊外邊打之迹徑山則不然忽有問語默涉
離微如何通不犯即對他道置將一問來

上堂修造未逾兩箇月叢林便覺日荒涼今朝重整
舊洪範鐵佛須教盡放光記得古人有一日不作一
日不食之語時時提起咬嚼過如醍醐灌頂諸人若

信得及驀地咬透便見禪道佛法當甚破甌單下座
四月八上堂今朝乃是黃面老子脇誕令辰諸方濃
煎香湯謂之浴佛徑山有條攀條大家濕漉佛佛或
時出或時沒從來不守舊窠窟既不守舊窠窟且作
麼生浴下座佛殿裏燒香

端午上堂五月五日端午節陰雲變隸甘雨未決
君王降賜寶香林下祈求懇切孚祐龍善時節好將
一兩潤焦枯匝地清涼消惱熱記得僧問乾峯十方
薄伽梵一路涅槃門未審路頭在什麼處峯以拄杖
子畫一畫云在遮裏僧後請益雲門門拈手中扇云
扇子踴跳上三十三天築著帝釋鼻孔東海鯉魚打

一棒兩似盆傾大衆乾峯搖頭雲門擺尾亘古亘今
掛人唇蓋徑山有條攀條拈拄杖擲下云會看雲雷
勃地起

上堂僧問放行特地瞞千山把住無端亦自瞞千手
大悲難摸捺鐵牛撞破趙州關如何是趙州關師云
天上天下人透不過進云有佛處不得住時如何師
云頭上漫漫進云無佛處急走過又作麼生師云三
千里外逢人不得錯舉進云恁麼則不去也師云割
進云摘楊花摘楊花又作麼生師云丁一卓二進云
金毛獅子尾吒沙師乃笑僧禮拜 師乃云有佛處
不得住陝府鐵牛雙角露無佛處急走過南海波斯

鼻孔大三千里外摘楊花種豆由來生稻麻拈拄杖
云趙州來也遂卓一卓下座

上堂舉僧問投子依稀似半月彷彿若三星乾坤收
不得師於何處明投子云道什麼僧云想師只有湛
水之波且無滔天之浪投子云閑言語雪竇拈云投
子古佛不道不知點檢將來直是天地懸隔纔問和
聲便打師云田地穩密佛眼不能窺坐靜惟惺快勝
千里還他投子老人透僧也解扣關擊節上門上戶
只是捩手脚不得雪竇道和聲便打也是賊過後張
弓

徑山禪寺語錄終

經山禪寺語錄終



